

HORONANTSARY NAMPOINA

Hanahirana an'Ingahy Filoha Rajoelina

Mendri-piderana ny finia- vana sy ny fahasahiana avy amin'ny Pr Ranjeva Raymond, hamoaka ny horonantsary nampitondra ny lohateny hoe "Nampoina", na koa "Ny rianka no valampariako", izay mampiseho manontolo ny soatoavina navelan'ny Mpanjaka Andrianampoinimerina ny votoatin'ny horonantsary, ka ny Pr Ranjeva Raymond, no nanangona sy nanoratra ny tantara, i Randrianierenana Henri no nandrintra ny horonantsary. Nandritra ny fampahafantarana izany tetikasa goavana izany, no nanambaran'ny Pr Ranjeva, fa ilaina ho fantatry ny tanora ankehitriny sy ny taranaka fara mandimby ny fahendrena navelan'ny Mpanjaka Andrianampoinimerina, sy ny fitiavan'io mpanjaka io ny firaisampirenena ary ny finia-

hampandroso ny malagasy rehetra nanerana an'i Madagasikara. Tonga nanome voninahitra ny lanonana fampahantarana tetsy amin'ny Hotel Carlton tetsy Ampelohy tamin'ny Alarobia 10 Novambra 2021 teo ny Filoha Ravalomanana Marc, izay nanambara fa tena ilaina ny fisian'ny horonantsary toy izao, satria mampihetsika ny fitiavan-tanindrazana eo amin'ny Malagasy, izay efa difotry ny fahantrana, hiteraka firaisankina ho an'ny malagasy hoy ny Filoha Ravalomanana ny toy izao, ka mandrisika azy handray andraikitra. Samy tsy mbola nisy nahita ny ao anatin'ny horonantsary fa ny azo antoka dia hisongadina ao ireo fi-hetsika sy fitenin'ny Mpanjaka Andrianampoinimerina, izay tokony ho lesona ho an'izay miton-

dra sady mbola manankery sy tsy lefy laza hatramin'izao ny voalazan'io mpanjaka io. Singanina manokana etoana ny kabary famerimberiny matetika toy ny hoe: "Fahavaloko ny mosary", hoan'ity mpanjaka ity dia zavadoza ho an'ny vahoaka ny mosary, ka ny miasa ny tany ihany no fomba mahomby ahafahana miady amin'ny mosary, voaporofa teo amin'ny tantara fa raha nisy ireo tonga nila fanampiana tany amin'ny mpanjaka dia nomeny angady. Ny Filoha Ravalomanana dia niezakana mafy tamin'ny fitsinjovana ireo tantsaha teo amin'ny fambolena sy ny fiompiana ary ny fanjonoana, mbola tsy adi-non'ireo tantsaha malagasy ny tetikasa "Psdr", izay nanampiana ny vahoaka tany amin'ny ton-tolo ambanivohitra, nisy

tamin'izany ny fizarana masomboly sy zezika, ny vokatra ny tantsaha novidiana tamin'ny sarany ara-dalàna, ka fay tateraka tamin'izany ireo mpijirika zatra nanararaotra ny tantsaha, ny biby fiompy vita vaksiny sady voaramaso ara-pahasahiana, ny mpanjono afaka miasa tsy voahelingelin'ny sinoa, ny fandriampahalemana azo antoka, ny lalana nivezivezen'ny vokatra tomombana, ary ny tsy azo amaivanina dia nisy ny ezaka nataon'ny fitondrana Ravalomanana niarovana ireo tantsaha teo amin'ny resaka fananantany. Fa nandritra ny fitondrana Rajoelina kosa dia farahidin'ny tantsaha, tsy misy ny finiaavana avy amin'ny mpitondra hitsinjovana ireo tantsaha, mahazo vahana ireo mpijirika mpambotry ny tantsaha, ny vary aza

moa lazain'Ingahy Filoha, fa roa taona hono vao vokatra ka aleo manafatra vary, hatramin'izao tsy hita popoka ireo sambo roapolo nolazain'Ingahy Filoha hitondra vary, ny mpiompy lasibatry ny asan-dahalo satria ireo mpitondra filaminana tazonin'ny mpitondra aty an-drenivohitra hanenjika ny mpanohitra, ny fanjonoana an-dranomasina hanjakan'ny sinoa, ireo velarantany mamokatra rehetra lasan'ny vahiny, mifanipaka tanteraka amin'ny fihevitra ny Mpanjaka Andrianampoinimerina ny ataon-dRajoelina. "Fahavaloko ny haintrano", mbola anisan'ny kabarin'Andrianampoinimerina io, ny tiany ambara eto dia ny fandroana amin'ny ankapobeny mihitsy, no tsy ankositrahan'ny mpanjaka na trano, na tanàna, na ala sns... Nandraisana fepe-tra hentitra izay tratra nandoro tamin'izany. Ny Filoha Ravalomanana dia nanao ho vaindohan-draharaha ny ady amin'ny dorotanety, sy ny fandi-pahana ny ala ary ny fiarovana ny tanàna amin'ny afo. F'Ingahy Filoha ankehitriny, dia tsy mbola maty ao an-tsaina ny 26 Janoary 2009, nisian'ny fandroana tanàna faobe, natomboka tetsy amin'ny Rnm sy Tvm, nifatra teny Anositrahan'ny Tanjom-bato, Behoririka, Ankoron-drano, mbola voatahiry ny horonampeo mirakitra ny

feon'Ingahy Filoha nitsodrano ireo mpandoro sy mpandroba. Fa hatramin'izao dia mbola tsy mitsahatra ny fahamiazana na an-tsaha na antanàna, toa ny any Ankarafantsika sy Menabe Antimena, ireo lazaina fa mpitondra tsy hita izay fandraisana andraikitra kanefa dia minisitry avivibe roa izao no ao. Santionany ihany ireo na-naovana fanamarihana ireo fa mbola betsaka ny azo ambara mikasika ny fahendren'ny Mpanjaka Andrianampoinimerina, fa ny tena manaitra avy hatrany dia tsapa fa misy ireo fomba fiasa itovizan'ny Filoha Ravalomanana amin'io mpanjaka malaza io, satria samy namome lanja ny tant-saha sy ny fihavanana ary ny firaisankina, etsy ankilany dia mibaribary tsy takona afenina, fa mifanipaka tanteraka amin'ny ataon'ity mpanjaka ity ny fomba fiasa sy fihevitra n'Ingahy Rajoelina nanomboka tamin'ny 26 Janoary 2009 ka hatramin'izao izy efa telo taona nitondrana izao. Amin'ny volana Aprily 2022 no hivoaka ity horonantsary goavana ity, izay nambaran'ny Pr Ranjeva Raymond, fa hararitaka ho hitan'ny tanora malagasy manerana an'i Madagasikara sy eran'izao tontolo izao, antenaina fa tsy ho gisitry amin'ny fahitanana izany Ingahy Filoha ankehitriny.

Ny Valosoa sy hadihady

Fiainam-pirenena

Tsy voafehin'ny fitondrana intsony ny vidim-piainana

Misafotofoto ny toe-draharaha eto amin'ny Firenena eo amin'ny sehatra rehetra amin'izao fotoana izao. Tsy fantatra intsony inona no tian'ny fitondrana atao, satria tsy fahaizana ve sa iniana atao ny fitantanana ity Firenena ity amin'izao endrin'ny izao? Tsy voafehy intsony ny fiakaran'ny vidim-piainana na dia nidradradra aza tamin'ny fotoan'andro, fa telo andro dia tsy maintsy midina ny vidin'ny zavatra ilain'ny mponina andavanandro. Rehefa tsy tafita izany dia nanafatra sakafo amin'ny sambo miisa roapolo. Mbola tsy hita ihany koa izay tohiny ary ny fantatra dia orinasa miankina amin'ny fanjakana, SPM, no omena alàlana hanafatra izany. Azo inoana fa misy olona ao an-dapa ao no mitantana ity orinasa ity, ka ny tombony amin'izany dia tsy mazava na harotsaka ao amin'ny kitapom-bolampanjakana, na halefa any amin'ny antsoina hoe "paradis fiscal", na any amin'ny kaontin'ny manampahefana any ivelany any. Miakatra izay tsy izy ny vidin-kena tato ho ato: ny henomby sy hena kisoa izany, miakatra manaraka izany koa ny vidin'ny akoho amam-borona. Ny vidin'ny fitaovana isan-karazany fanaovan-trano ihany koa, midangana izay tsy izy ankehitriny. Efa nambara teto amin'ny gazety izay fa: tsy rariny intsony ity vidina simenitra sy vidina vy ity, ... Mbola mitohy ihany ny serasera momba ilay fananganana ny fitateram-bahoaka eny amin'ny habakabaka, "téléphérique", na dia tsy hisy fiantraikany mivantana amin'ny fiainam-bahoaka aza izany. Tsy misy olona hahazaka izany saran-dàlana telo arivo na efatra arivo ariany izany eto amin'ny Firenena. Tsy hanova ny fitohanany fiara eny amin'ireo lalam-pirenena mivoaka ny renivohitra ireny: Ankadim-bahoaka, Anosizato, Ambohio, Mahazo, Analamahitsy. Raha ny "bus class" no resahina dia mety amin'ny olona sasany ny saran-dàlana, satria voatery miova taksibe in-telo izy satria ireny olona ireny dia mety miova ka sady tsy lany fotoana izy raha izay ny zava-misy. Ambonin'izany dia tsy mbola lany tao amin'ny Antenimiera roa tonta ny fisamboram-bola dimampolo ambizato tapitrisa euros kanefa maro an'isa moa ny depote sy loholona, izay tsy mandinika lalina fa mananga-tànana andaniana ny rendrahendran'ny filohan'ny Repoblika hatrany. Distrika efatra ao anatin'ny tanànan'Antananarivo ihany no hisitraka izany kanefa ny vahoaka Malagasy manerana ny Nosy no hibaby io trosa be io. Raha ny fampihenana ny fitohanana tokoa no tanjona dia efa tao anatin'ny vitan'ny filohan'ny Repoblika ihany ny hanaovana "fly

over" amin'ireo toerana misy fitohanana voatanisa etsy ambony ireo, ka raha izany vola hindramina hanaovana "téléphérique" izany dia hahavitana manangana "fly over" folo. Raha laharam-pamehana no asian-teny dia ny tsy fanjaran-tsakafo sy ny kere any Atsimo, no tokony hihazakazahana ny fanalefahana na ny fanafoanana izany mihitsy aza. Ny mampianahy ihany koa dia sao dia efa brokatera toy ireo lohamasinina novidiana ho an'ny zotra Fianarantsoa-Manakara (FCE) sy ny "Airbus 340" ho an'ny Air Mad izany "téléphérique" izany, ka ho voa roa toy ny dakamboriky indray ny Firenena efa mahantra ity, ka ny eo tsy misy mandeha amin'izay laoniny kanefa ny trosa babena ihany. Tsy misy mangirana ihany koa, izao no hitantana ity fitateram-bahoaka ity, ny kaominina Antananarivo renivohitra, sa ny fitondrana satria volam-bahoaka no miady ao. Tsy mampiova na inona na inona ihany koa ny nananganana ny kianjan'i Mahamasina satria tsy mbola nisy vola niditra hatramin'ny nitokanana azy, ankoatry ny vidina tapakila tamin'ny lalaon'ny ekipam-pirenena gasy nihaona tamin'ny Ethiopiana. Araka ny fantatra dia homena orinasa tsy miankina ny fitantanana ity kianja ity kanefa dia fananan'ny tananan'Antananarivo madiodiodio izy io. Azo inoana fa tandapa indray no homena ny fitantanana, ka tsy hisy hijanona eto indray ny vola hiditra fa hivoaka antsohosoko any ivelany toy ny vola vahiny niaraka tamin'ny volamena 73, 5 kilao. Hanofa fiaramanidina hono ny kaompaniam-pirenena Air Mad amin'izao fisokafan'ny habakabak'i Madagasikara izao. Mandritra ny efatra volana no hanofana fiaramanidina satria amin'izay vao ho vita ny fanamboarana ny Airbus 340. Ny manahirana dia nahoana no tsy tafiditra tao anatin'ny fandaharan'asan'ny mpitondra ny fanarenana ity orinasam-pirenena ity tao anatin'izay telo taona izay, fa efa miala aina ny orinasa vao mitady vahaolana. Mampianahy ny maro ny fomba fiasan'ny fitondrana Rajoelina Andry raha ny sehatra isan-karazany izay azo antoka fa hampiakatra ny harin-karena satria navelany ho potika avokoa, ka anisan'izany ireo orinasa mpanao siramamy, ny Secren any Antsiranana, sns, ... Tokana ihany ny fomba hanavotana ity Firenena manankarena ity kanefa tsy mahavelona ny mponina ao aminy dia ny fanoharana sy ny tsy fanekena intsony ny fanaovan'ny mpitondra izay tiany atao hampahantra ny vahoaka, fa hampitomboiny ny miditra any am-paosiny sy ny mpiray petsapetsa aminy.

Andry Tsiavalona

TONOMIKALO

Ry mpitandro filaminana

Ry miaramila, ry zandary, ry polisy mpihetraketraka, Zatra ny mampiasa hery fa toa tsy mahay mipetraka. Mba meteza handanjalanja, saina ihany izay atao, Sao lahy hivaly sy hifotitra amin'ireo taranakao ! Tato ho ato dia nanjaka ny fanaovana herisetra. Be `nareo no nikoizana tamin'ny fomba sy ny toetra. Tao ireo tena nampijaly, (toy ny olon-tsy misaina !) Saingy mba tsarovy ihany, tsy anareo anie ny aina ! Olona tsy mbola meloka fa vao entina hotsaraina, Dia efa tena matin-daroka, mila hiala hatramin'ny aina. Mba sekoly taiza re no nampianarana an'izany, Fa dia tena hafa loatra sy ikoizana eran-tany ! Dahalo, indreo manafo ny ataony, tena mampihorohoro, Fa manafika tanàna, dia mandroba sy mandoro, Nefa dia tsy misy hafitsoka iretsy maro aminareo. (Toa vava fotsiny no betsaka, tsisy hapoaka nony avy eo!) Potika ny firenena, miaina anaty fahalovana. Ireo mpitondra ambony hatrany no matetika arovana, Fa ireo vahoaka tsotra, very mpiaro sy mpiahy, Satria `nareo mba nantainy no niofo ho jiolahy ! ...Mbola ho azonay vahoaka itokiana sy iankinana Ve `nareo rehetra ambara ho mpitandro filaminana ? Raha "eny" dia meteza hiova fomba sy famindra: Mba ho "marina" sy "mendrika" fa izay no tsara indrindra !

TSIMIMALO (09-11-21)